



Cusseglier guvernativ Mario Cavigelli; Corina Caluori; Gabriela Tomaschett-Berther; Alessandro Della Vedova, vicepresidente dalla pcd grischuna; Jeanette Bürgi-Büchel, dr. Suzanne von Blumenthal; Elisabeth Sigron e Nicolina Bürkli-Laim (da sen.). MAD

Pcd dallas dunnas en il Grischun

Il dilemma da clamada e/ni famiglia

■ (cp) Gievgia vargada ha la radunanza annuala dallas dunnas dalla Partida cristiandemocratica (pcd) dil Grischun giu liug el Hotel Sternen a Domat. Ultra dallas fatschentas statutaricas eisi stau da prender cumiau dalla suprastonta Corina Caluori, suppleanta al cussegl grond, Zezras. Ella ha demissionau ord raschuns da famiglia suenter esser stada varga treis onns en suprastonta. La presidenta, Jeanette Bürgi-Büchel, ha engraziu alla demissiononta per sia lavur en favur dallas dunnas. La suprastonta vegn a s'engaschar era egl avegnir cumpleinamein per ils interess, giavischs e las finamiras dallas dunnas ella politica.

Suenter la radunanza ha dr. Suzanne von Blumenthal, anteriura caumiedia dils Survetschs psichiatics dil Grischun e

mumma da dus affons, referiu sur dil tema «Clamada e/ni famiglia – in dilemma?». La referenta ha dau ina zun interessanta investa en sia veta professionala e familiara. Ella ha mussau co ella ha dau damogn allas sfidas. Silsuenter ha ina viva discussiun giu liug. Ils politichers presents ed interessai han puntuau l'impurtonza da migliurar la cumpatibilitad denter clamada e famiglia. Plinavon munglassen las familgas haver ina segira puseivladad da puder surdar lur affons ad ina survigilanza competent. Las dunnas pretendan dalla politica e societad da crear kundiziuns optimalas. Igl ei vegniu accentuau la muntada dalla discussiun politica en favur d' in svilup positiv davart il tema dalla cumpatibilitad da famiglia e profession per las dunnas.

Ün schi s-chars da la pld Grischun areguard la strategia d'energia 2050

■ (cp) La PLD. Ils Liberals Grischun ha decis illa sezziada dal comité dals 10 avrigl la parola da schi areguard la strategia d'energia 2050. Quai in analogia a la partida svizra. Il tema es gnü debattü intensivamaing, la magiorità d'era s-charsa. Positiv es cha la proposta prevezza da rinforzar l'energia d'aua, uschè importanta i'l chantun Grischun ed important eir in vista a la discussiun regard il fits d'aua. Positiv eir cha la proposta prevezza da bandunar a l'inlunga il sistem dals pajamaints fixes per energia so-

lara. Positiv implü cha la dumanda che lavuors chi's possa trar giò da las impostas renovand ün stabilimaint vain reglada plü generusamaing. Negativ i'ls ögls da la minorità l'economia da subvenziuns e daplü impostas per la chasada e la ditte augmentand amo ils pajamaints fixes. Finalmaing ha vis la magiorità daplü avantags co dischavantags. Unanimità s'haja pudü constatar illa decisiun ch'al proget dal cussagl federal regard il clima ed il sistem per manisar l'energia stopcha gnir aboli.

Per en po pi bod

■ (anr/gns) La premaveira è er aint igl Grischun igl taimp d'aspargias. Las aspargias grischunas èn ena delicatessa e gostan igl pi bagn curt siva tgi ellas vignan tagledas. Chest onn ò la raccolta gio scumanzo e chegl per en po pi bod tgi igls davos onns. Egn da chels tschintg producents d'aspargias tgi dat aint igl Grischun è Hanspeter Gisler digl bagn puril «Schönbühl» a Coira. An ena premaveira raccolta el vers 40 tonnas

aspargias e chest onn ò gio scumanzo la raccolta. Taglea las ampremas aspargias ins vegia igls 3 d'avregl, dei la feglia digl pour. Chegl seian tuttegnas dus emdas pi bod tgi usito. Cun esser gio pi dei las temperaturas pi ampernevas creschan las aspargias damai considerablamaintg pi bod, chegl tgi allegra betg angal igls gourmets, mabagn er blets oters tgi gioldan la delicatessa roiala an tot las furmas cuschinadas e chegl cun u sainza sosas.



dat gio las aspargias grischunas e chegl gist dretg sen Pasca. Bun appetat! FOTO G. N. STIGIER

La mort dil profet

Venderdis sogn

DAD URSICIN G. G. DERUNGS

■ Igl ei bien da sefermar in mument als fatgs historics dil venderdis sogn: in Gediu cartent della Galilea ch'ha provocau la religiun dil temps ed il tempel, in ch'ls autsacerdots – en uffeci era Caifas – consideravan sco blasfemader, sco smanatscha per la religiun e per tut lur interess, è considerablamein materials, ei vegnius crucifigaus. Siu num era Jesus, Jesus de Nazaret. Il Sinedri, il cussegl de notabels gediis a Jerusalem, era seviults agl «uorden public» ch'era els mauns della pussonza occuponta, dils Romans cun Pontius Pilatus sco guvernatur. Quel ha fatg cuortas e truau Jesus alla crucifigaziun, peina romana tipica per malfatschents, ual schi crudeivla e dolorosa sco turpegiusa.

Tier ils datums historics s'aua la crusch sezza, zatgei sc'ina fuortga cun plira bratscha, en bia fuormas, ual sco ei capitava. La schuldada crucifigava baul sin ina moda, baul sin in'otra. Ils condemnai eran savens sclavs rebels. Ei saveva capitar da veser sper la via Appia entris uauls de cruschs ni fuortgas cun lur pendis. Sco ils evangelis relatan deva ei quei di sper Jesus aunc dus auters da crucifigiar. La mort sco crucifigau era considerada ina gronda vergugna. «Turpissima mors crucis», di Cicero. Biars pendevan dis en e dis o vid il pal, vegnevan strusch si cul flad e murevan stenschi. Las cruschs eran veseivlas, il «pal della vergugna» per tementar tgi che vess giu mustgas da far rebellun. Jesus, il profet de Nazaret, ei

morts quei medem di ch'el ei vegnius crucifigaus.

Ils adherents de Jesus, buca mo umens, mo quels oravontut, eran fugi desperai ed ord tema. Dunnas che suandavan el (cfr. Lc 8, 3) paran dad esser s'avischinadas al crucifigau. En scadin cass, cu femnas ed umens che vevan accumpignau Jesus ein vegni pertscharts ch'el vivi, sepresentava per els la damonda co explicar ina mort schi infama e scandalusa; buca mo la mort d'in malfatschent, mobein quella d'in blasfemader. «Smaleddius ei quel che penda vid il lenn» (Gal 3, 13), veva ei num ella lescha de Mose (Dt 21, 31). Co capir il «smaleddiu» sco «salvader»?

Per interpretar la mort turpegiusa de Jesus dev'ei pils cartents Gediis oravontut la profezia dil «serv suffrent de Jahve» (Is 53): «Sprezzaus era el... in um della dolor. Mo el ha purtau nos mals, supportau nossas dolurs... perforaus da nos puccaus, pitgaus da nos malfatgs...». Ina sorprendente profezia fatga 500 onns avon la crucifigaziun de Jesus, quasi ina «fotografia» dils schabetgs dil venderdis sogn. Igl ei buc excluda che Jesus sez, mond viers sia passiuun, ha anflau egl «um dellas dolurs» ord la profezia d'Isaia sia atgna via, sesez.

Mo senza entrar ellas interpretaziuns ch'ei vegnidas dadas posteriurme in e tochen oz della mort de Jesus sefermein cheu mo cuort alla damonda en tgei che Jesus era in scandel per siu temps. Ina dellas reproschas ch'ins fageva era ch'el sesi a meisa cun pitaunas e pucconts (Mt

9, 10–11). El annunziava il perdun dils puccaus senza kundiziuns, cu «mo Dieus sa perdunar puccaus». «Conversiuun» era buca kundiziun, mobein consequenza dil perdun. Siu Diu era buca «contabilist della moral», in legalist engurgniu che pesava las ovras vid ils paragrafs fatgs da carstgauns. La misericordia era buca concepida sco «feivlezia» da vart d'in Diu ch'ha buca fidonza el carstgaun, mobein sco «forza» de sia justia, ed il perdun sco act creativ che fa ord il puccont ina nova creatira. Igl ei in Diu, quel de Jesus, ch'ha plascher ded esser culs carstgauns, sco l'episoda de Zacheus raquenta (Lc 19). Denter auter divideva Jesus plaids critics dils profets, oravontut Osea 6, 6: «Misericordia vi jeu, buca sacrificis», zatgei che tunava buca bein ellas ureglias della casta sacerdotala a Jerusalem che viveva dallas entradas dil tempel, la «banca nazionala» della Giudea (Thomas Söding), dals daners pils sacrificis e dallas taglias tschitschadas o dalla paupra puraglia della Galilea.

La mort de Jesus vid la crusch cun tut sias damondas ha denton occupau las generaziuns suandontas, culla resca d'isolar la crusch e la mort dalla veta terrestra de Jesus e metter quei ensemen cun la levada. Mo igl ei impurtont da schar esser il venderdis sogn quei ch'el ei e buca mischedar el cun Pastgas. Pertgei la mort de Jesus conferma tut quei ch'el ha fatg ed ei staus en sia veta e ch'ha dau era a biars che dividan buca la cardientscha pascala in ault maletg dil carstgaun, ina speranza, in tegn e cuntengn.

600 ONNS FRA CLAU DA FLIA

Occurrenzas ed acziuns era el Grischun

(anr/gc) Sco ils iniziants han annunziu – ed era giu giavischau – duei «600 onns Clau da Flia» vegnir commemoraus en l'entira Svizra. Ei dat perquei era diversas occurrenzas ed acziuns el Grischun, numnadamain a:

Cuera

Giu liug all'entschatta da quest meins ha ina discussiun davart Clau da Flia alla Scola aulta da teologia a Cuera. Ins ha numnau quella occurrenza «Café scientific». Plidau han: Eva-Maria Faber, cuss. gov. Franz Enderli (Sursilvania), e Claude Bachmann, responsabel per la lavur dalla baselgia cun la giuventetgna.

Ils 28 da matg datti ella catedrala a Cuera viaspras ord igl uffeci en honor da s. Clau da Flia cun uestg *Vitus Huonder*. A cantar vegnan: La scola (cant gregorian) dalla «Hofkirche» a Lucerna, ina scola da Küsnacht, conventuals da Münster e students da musica da Basilea. All'orgla: Andreas Jetter, directur da musica dalla catedrala.


Il mobil «s. Clau da Flia va sin via» seferma ils 17 da fenadur 2017 silla Piazza di Teater a Cuera. Dils 2–9 da settember pelegreschan students dalla Scola aulta da teologia da Cuera el Ranft en otag etappas e tut a pei. Interessents san era far part da quel entiramein ni sin certs tschan-cuns.

Degen en Lumnezia

Previda ei ina prelecziun dil scribent *Arno Camenisch* ella caplutta da s. Vetger (Victor) a Degen en Lumnezia cun accumpignament musical. Dil zercladur tochen il settember san ins visitar la cella (installada) da Fra Clau da Flia ella caplutta da s. Vetger sper Degen.

Breil

All'entschatta da november vegnan tschentadas ella baselgia parochiala da Breil damondas sur da s. Fra Clau da Flia: Tgi fuva el, tgei ha el fatg e pertgei? Quei succeda en collaboraziun cun la Scol'aula da teologia a Cuera.



Ella baselgia parochiala a Breil han pliras occurrenzas per «600 onns Fra Clau da Flia» liug. MAD

Ils 10 da november ha liug era ella parochiala a Breil in concert en connex cul Fra Clau da Flia. Las treis giuvnas musicistas *Giulia Cathomen*, *Fiona Cavegn* e *Svenia Tuor* interpreteschan l'enconuschenta oraziun da Fra Clau da Flia: «Miu Segner, miu Diu...» ton per romantich sco per tudestg.

La culminaziun dallas occurrenzas per «600 onns Fra Clau da Flia» el Grischun ei il teater musical «Der Ranft – Ruf» che vegn daus ils 11 da november 2017 ella baselgia parochiala a Breil. Quei teater-musical lai reviver en lungatg, musica e cant las visiuns dil misticher s. Clau da Flia. Il nuschegl spiritual da quei teater musical ei in'acziun enramonta e cumpilonta, dada da carstgauns dad oz. Ils 12 da november vegn celebrau a Breil en

quei connex in survetsch divin da famiglia.

Aschera, Val S. Pieder e Puntraschna

Dumengia, ils 24 da settember vegn salvau ella baselgia da s. Clau da Flia ad Aschera (Schiers) in survetsch divin pils fideivels dalla Purtenza dado ed amiez en honor dil sogn dil Ranft. A Val S. Pieder ha liug ils 25 da settember – gest il di ch'ins commemorescha s. Clau da Flia – sco ming'onn ina messa festiva ella caplutta, dedicata a s. Clau da Flia, sper la via en Zervreila. A Puntraschna datti ils 18 da november in di da cuminonza en honor da s. Fra Clau da Flia cun in vast e variu program ed in survetsch divin festiv.